

國學基本叢書  
歷代職官表

五

書叢本基學國

表官職代歷

(五)

纂修敕奉等塔永

行發館書印務商

# 歷代職官表卷三十八

## 內務府下

歷代建置

唐

【唐書百官志】殿中省監一人。從三品。少監二人。從四品上。丞二人。從五品上。監掌天子服御之事。其屬有六局。曰尙食、尙藥、尙衣、尙乘、尙舍、尙輦。少監爲之貳。武德元年。改殿內監曰殿中省。龍朔二年。曰中御府。監曰大監。丞曰大夫。有令史四人。書令史十二人。左右仗。千牛。各十人。掌固。亭長。各八人。舊有天藏府。開元二十二年。省。尙食局奉御二人。正五品下。直長五人。正七品上。諸奉御、直長、品皆如之。食醫八人。正九品下。奉御掌儲供。直長爲之貳。進御必辨時禁先嘗之。饗百官賓客。則與光祿視品秩而供。凡諸陵月享視膳。乃獻。龍朔二年。改尙食局曰奉膳局。諸局奉御。皆曰大夫。有書令史二人。書吏五人。主食十六人。主膳八百四十人。掌固八人。尙藥局奉御二人。直長二人。掌和御藥診視。凡藥供御。中書、門下、長官及諸衛上將軍各一人。與監奉御泄之。藥成。醫佐以上先嘗。疏本方。具歲月日泄者署奏。餌自奉御先嘗。殿中監次之。皇太子又次之。然後進御。太常每季閱送上藥。還其朽腐。左右羽林軍給藥。飛騎萬騎病者頒焉。龍朔

二年。改尙藥局曰奉醫局。有按摩師四人。呪禁師四人。書令史二人。書吏四人。直官十人。主藥十二人。藥童三十人。合口脂匠二人。掌固四人。尙衣局奉御二人。直長四人。掌供冕服几案。祭祀則奉鎮圭于監。而進于天子。大朝會設案。龍朔二年。改尙衣局曰奉冕局。有書令史三人。書吏四人。主衣十六人。掌固四人。尙舍局奉御二人。直長六人。掌殿庭祭祀。張設湯沐燈燭灑掃之事。○閑廐使以殿中監承恩遇者爲之。押五坊以供時狩。一曰鵬坊。二曰鶻坊。三曰鶴坊。四曰鷹坊。五曰狗坊。侍御尙醫二人。正六品上。主事二人。從九品上。

謹案唐殿中監領六局。其四局爲今內務府諸司之職。其尙乘、尙輦、二局分著於鑾儀衛。太僕寺篇中茲不具列。殿中監又有閑廐使。與上駟院之職相近。惟所領五坊以供時狩者爲今養鷹狗處之制。故附著於此。

【唐書百官志】內侍省監二人。少監二人。○監掌內侍奉宣制令。其屬六局。曰掖庭、宮闈、奚官、內僕、內府、內坊。少監內侍爲之貳。皇后親蠶則升壇執儀。大駕出入爲夾引。武德四年。改長秋監曰內侍監。內承奉曰內常侍。內承直曰內給事。龍朔二年。改監爲書。武后垂拱元年。曰司宮臺。天寶十三年。置內侍監。改內侍曰少監。尋更置內侍。內謁者監十人。掌儀法宣奏承敕令。掖庭局令二人。丞三人。掌宮人簿帳女工。宮闈局令二人。丞二人。掌侍宮闈出入管籥。奚官局令二人。掌奚隸工役宮官之品。內僕局令二人。丞二人。掌中宮車乘。內府局令二人。丞二人。掌中藏寶貨給納之數。及供燈燭湯沐張設。

謹案內侍省之名昉於隋代其職則自秦漢以來卽有長秋之制惟漢法參用士人至後代則專用奄宦寢失古意考唐內侍省六局所掌皆今內務府廣儲掌儀諸司及內管領之職聖朝慎重職司一不以奄豎參預其事洵超軼前古之制非隋唐所可幾及矣茲以內侍省官制中頗有近於內務府者並採附篇內以著前代之得失其列代宦官不盡著焉

【唐書百官志】少府監一人從三品少監二人從四品下掌百工技巧之政總中尙左尙右尙織染掌冶五署及諸冶鑄錢互市等監供天子器御后妃服飾及郊廟圭玉百官儀物凡武庫袍襦皆識其輕重乃藏之冬至元日以給衛士諸州市牛皮角以供用牧畜角筋腦革悉輸焉細鏤之工教以四年車路樂器之工三年平漫刀稍之工二年矢鏃竹漆屈柳之工半焉冠冕弁幘之工九月教作者傳家技四季以令丞試之歲終以監試之皆物勒工名丞六人從六品下掌判監事給五署所須金石齒革羽毛竹木所入之物各以名數州土爲籍工役衆寡難易有等差而均其勞逸主簿二人從七品下錄事二人從九品上武德初廢監以諸署隸太府寺貞觀元年復置龍朔二年改曰內府監武后垂拱元年曰尙方監有府二十七人史十七人計吏三人亭長八人掌固六人短蕃匠五千二十九人綾錦坊巧兒三百六十五人內作使綾匠八十三人掖庭綾匠百五十人內作巧兒四十二人配京都諸司諸使雜匠百二十五人中尙署令一人從七品下丞二人從八品下掌供郊祀圭璧及天子器玩后妃服飾彫文錯綵之制凡金木齒革羽毛任土以時而供歲二月獻牙尺寒食獻毬五月獻綬帶夏至獻雷車七月獻鈿針臘日獻口脂唯筆琴瑟絃月

獻金銀暨紙非旨不獻。製魚袋以給百官。蕃客賜寶鈿帶。魚袋則授鴻臚寺丞。主簿監作四人。從九品下。凡監作皆同品。有府九人。史十八人。典事四人。掌固四人。唐改內尚方署曰中尚方署。武后改少府監曰金銀作。尚方監。而中。左。右。尚方。織染方。掌治方。五署。皆去方以避監。自是不改矣。有坊院。掌治署令一人。正八品上。丞二人。正九品上。掌范鎔金銀銅鐵及塗飾琉璃玉作銅鐵人得採而官收以稅。唯鐵官市邊州不置鐵冶。器用所須皆官供。凡諸冶成器上數於少府監。然後給之。監作二人。有府六人。史十二人。典事二十三人。掌固四人。

【冊府元龜】哀帝天祐三年敕牛羊司收管御廚羊并乳牛等。御廚物料並送河南府收管。其牛羊司官使並宜停廢。

謹案唐少府官制詳於工作而略於儲藏。蓋既有太府之左右藏以爲外府。復有內侍省之內藏。主以中人。則貨賄已有分掌之司。無須歸於少府也。天寶後設百寶大盈庫皆以中官主之。謂之內庫。其後又有瓊林大盈延資庫等名焉。

### 五季

【舊五代史梁太祖本紀】開平元年改御合使爲司膳使。

【五代會要】晉開運三年二月詔少府監今後凡修制親王婚禮法物並冊文出降公主九樹花釵箱蓋宜令不得用龍鳳紅條帕。

【冊府元龜】後唐莊宗同光初。諸寺監各只置大卿。其餘官屬並權停。

【玉海】後唐聶元祚爲少府監。

【冊府元龜】後唐杜紹光爲少府少監。天成二年。上言。當司掌朝服儀仗祭器服。兵戈已來。散失向盡。往例有丞。主簿。五署令。共一十六員。自僞梁廢省。乞下中書量置丞。簿。署令。分主當局公事。○杜景爲殿中丞。天成四年。上言。以本司法物。寄於寺觀。請量修公署。

【玉海】晉李鍇。少帝時爲少府監。

【冊府元龜】後唐莊宗卽位。以李紹宏爲宣徽南院使。兼掌內勾。天下財穀。皆委裁遣。○孟漢瓊。明宗時爲宣徽北院使。○晉漢以來。宣徽院有內班之名。周循其舊。而史闕官號。

謹案。五季官制缺略。無足探證。今考諸書所載。少府令。丞。主簿。廢於梁時。諸卿。少卿。停於唐代。乃至儀仗散失。法物或寄於寺觀。其草略可見。後唐以宦者爲宣徽使。主天下財穀。蓋亦循唐時內庫之制。而宣徽之名。實首見於此也。

宋

【宋史職官志】宣徽南院使。北院使。掌總領內諸司及三班內侍之籍。郊祀朝會宴饗供帳之儀。應內外進奉。悉檢視其名物。舊制以檢校爲使。或領節度及兩使留後。闕則樞密副使一人兼領。二使

亦有兼樞密副使、簽書樞密院者。南院資望比北院頗優，然皆通掌，止用南院印。二使共院，而各設廳事。其吏史則有都勾押官各一人，前行三人，後行十二人，分掌四案：一曰兵案，二曰騎案，三曰倉案，四曰胄案。故事與參知政事、樞密副使同知樞密院事，以先後入敘位。熙寧四年，詔位參政、樞密副知，下著爲令。九年，詔今後遇以職事侍殿上，或中書、樞密院合班問聖體及非次慶賀，並特序二府班。官制行罷宣徽院，以職事分隸省寺，而使號猶存。

謹案：宋代樞密、宣徽、三司使，謂之內職，而宣徽掌總領內諸司及三班內侍之職，是南北院使正如今內務府總管之任，故錄著於篇中。

【宋史職官志】殿中省監、少監、監丞各一人，監掌供奉天子玉食、醫藥、服御、幄帟、輿轡、舍次之政令，少監爲之貳，丞參領之。凡總六局：曰尙食、掌膳羞之事；曰尙藥、掌和劑診候之事；曰尙醢、掌酒醴之事；曰尙衣、掌衣服冠冕之事；曰尙舍、掌次舍幄帟之事；曰尙輦、掌輿輦之事。六尙各有典御二人，奉御六人，或四人，監門二人，或一人，又尙食有膳工，尙藥有醫師，尙醢有酒工，尙衣有衣徒，尙舍有幕士，尙輦有正供等，皆分隸其局。又置提舉六尙局及管幹官一員，舊殿中省判省事一人，以無職事朝官充。雖有六尙局名，別有事存。凡官隨局而移，不領於本省。所掌唯郊祀元日冬至、天子御殿及禘祫后廟神主赴太廟供具、繖扇，而殿中監、祕書監爲寄祿官而已。元豐中，神宗欲復建此官，而度禁中未有其地，但詔御輦院不隸省寺，令專達焉。初，權太府卿林顏因按內藏

庫見乘輿服御雜貯百物中乃乞復殿中省六尙以嚴奉至尊於是徽宗乃出先朝所度殿中省圖命三省行之○御藥院勾當官無常員以入內內侍充掌按驗祕方以時劑和藥品以進御及供奉禁中之用典八人藥童十一人匠七人崇寧二年併入殿中省○尙衣庫使副使舊曰尙衣庫大中祥符三年

改監官二人以內侍三班充掌駕頭服御繖扇之名物凡御殿大禮前一日請乘輿袞冕鎮圭袍服

於禁中以待進御事已復還內庫典一人匠四人掌庫十人○內衣物庫在文德殿後太平興國二年置受納匹段庫受納綾羅四州

鹿胎綾羅絹匹段大祥符元年併入監官二人以京朝官併內侍充舊三人以諸司使副及三班內侍充掌受納錦綺綾羅色帛銀器腰

束帶料造年支準備衣服以待頒賜諸王宗室文武近臣禁軍將校時服并給宰臣親王皇親使相

生日器幣兩府臣僚百官皇親轉官中謝朝辭特賜及大遼諸外國人使辭見銀器射弓衣帶典八

人掌庫二十一人○親衣庫在太平坊監官二人以諸司使副三班及內侍充掌受錦綺雜帛衣服之

物以備給賜及邦國儀注之用并受納衣服以賜諸司工匠諸軍監門二人以三班使臣充典十人

掌庫五十五人○朝服法物庫太平興國二年置後分三庫一在天安殿後一在右掖門內北廊一在正陽門外監官二人以諸司使副及三

班內侍充掌百官朝服諸司儀仗之名物典三人掌庫三十人已上崇寧二年併入殿中省舊有裁造院

針線院雜實場後省併之

【馬端臨文獻通考】太府寺卿掌財貨出納貿易之事凡貢賦之輸於京師者至則別而受之供君

之用。及待邊費。則歸于內藏。供國之用。及待經費。則歸於左藏。所隸官司二十有五。內藏庫掌受歲計之餘積。以待邦國非常之用。奉宸庫掌供內庭。凡金玉珠寶良貨賄藏焉。祇候庫掌受錢帛器皿衣服。以備傳詔頒給。及殿庭賜予。審計司掌審受給數。驅磨當否。商稅務收京城商稅。店宅務掌管官邸店。

謹案唐太府唯掌左右藏。以待經費。內藏供奉之職不與焉。至宋則分受供君供國之用。而設官尤廣。故內藏奉宸祇候。皆如今廣儲司之掌。審計則如會計司。而商稅務店宅務。亦如今崇文門監督官房租庫之總領於內務府也。

【石林燕語】內香藥庫在謬門外。凡二十八庫。真宗賜御製七言二韻詩一首。爲庫額曰。每歲沉檀來遠裔。累朝珠玉實皇居。今辰內府初開處。充牣尤宜史筆書。

謹案真宗詩所云。內府當卽宋志內藏庫。內香藥庫近于今之御藥房矣。

【玉海】少府監掌造門戟旌節祭玉法物。乃供祭器鑄印。以朝官判。元豐四年十一月五日。詔鑄省臺等監印記凡六十三。官制行。總局四。掌百工技巧乘輿服御之物。祭祀朝會禮樂之器服。皆有法式。冊寶符節度量權衡之制亦如之。

【文獻通考】宋少府監判監事一人。以朝官充。凡天子器玩后妃服飾雕文錯彩工巧之事。分隸于

文思院、後苑、造作所。本監但掌造門戟、神衣、旌節、郊廟諸壇祭玉、法物、鑄牌、印、朱記、百官拜表案褥之事。元豐正官制，置監、少監、丞、主簿各一人。所隸官屬五。文思院掌造金銀犀玉工巧之物，金采綉素裝鈿之飾，以供輿輦冊寶法物及凡器服之用。監官文臣一員，武臣二員。綾錦院掌織紵錦繡，以供乘輿及凡服飾之用。監官三人，以京朝官諸司使副及內侍充。裁造院掌裁製服飾。監官二人，文繡院掌纂繡，以供乘輿服御及賓客祭祀之用。建炎初，以將作少府監併歸工部。紹興三年，復置將作監，少府事統焉。○入內內侍省，內侍省其屬有御藥院、勾當官四人，掌按驗方書，修合藥劑，以待進御及供奉禁中之用。內東門司、勾當官四人，掌宮禁人物出入，周知其名數，而譏察之。合同，憑由司監官二人，掌禁中宣索之物，給其要驗。造作所掌造作禁中及皇屬婚娶之名拜，龍圖、天章、寶文閣、勾當官四人，掌藏祖宗文章圖籍及符瑞寶玩之物，而安像設以崇奉之。翰林院、勾當官一人，總天文、書藝、圖畫、醫官、四局，凡執伎以事上者皆在焉。

【隣幾雜誌】文思院不知緣何得此名，或云量名時文思案，或說殿名聚工巧於其側，因名之曰文思院。

謹案，宋初文思院、後苑、造作所，別有官屬，不隸少府。元豐定制，始改隸之。今廣儲司、造辦處諸職，其時皆爲少府所統。迨南渡以後，廢少府隸工部，以文思院屬之。其官屬並從工部辟差，旋又改

隸將作監變更不一其職事則皆同也。內侍省官屬御藥院猶今之藥房。合同憑由司猶今之會計司。造作所猶今之造辦處。龍圖天章寶文閣勾當官翰林院勾當官猶今武英殿御書處文淵閣管理事務諸職蓋前代內侍所掌者至我朝而特設官職始釐正其體統焉。

遼

【遼史百官志】宣徽北院太宗會同元年置掌北院御前祇應之事北院宣徽使知北院宣徽事北院宣徽副使同知北院宣徽事○宣徽南院會同元年置掌南院御前祇應之事南院宣徽使知南院宣徽事南院宣徽副使同知南院宣徽事○北面御帳官奉宸司掌供奉宸御之事○北面著帳官筆硯局筆硯祇候郎君筆硯吏牌印局牌印郎君柵褥局柵褥郎君燈燭局燈燭郎君牀幔局牀幔郎君殿幄局殿幄郎君車輿局車輿郎君御盞局御盞郎君本班局本班郎君○承應小底局筆硯小底寢殿小底佛殿小底司藏小底習馬小底鷹坊小底湯藥小底尙飲小底盥漱小底尙衣小底裁造小底○北面宮官諸行宮都部署院總契丹漢人諸行宮之事諸行宮都部署知行宮諸部署司事諸行宮副部署諸行宮判官○契丹行宮諸部署司總行在軍諸鄂爾多滿洲語。亭也。原作幹管朵。今改正。之政令契丹行宮都部署知契丹行宮都部署事契丹行宮副都署契丹行宮判官○行宮諸部署司掌行在諸宮之政令行宮都部署行宮副部署行宮都部署判官○北面坊場官諸坊職名總目某

坊使某坊副使某坊詳衮蒙古語。理事官也。原作詳衮。今改正。使某坊詳衮某坊都監鷹坊鐵坊五坊未詳八坊內有軍器坊未詳

謹案遼官分北面南面以上皆北面官也其供御之官至爲繁多職掌雖不盡可考而以類求之皆可得其彷彿史言遼宣徽視工部蓋以其專主工作言之是猶唐宋少府也奉宸祗候在宋爲殿中省之屬而承應諸職則服食寢處之事皆備矣行宮部署院諸司猶今日行宮之有總管苑丞而八坊使內有鷹坊鐵坊餘雖未詳蓋皆近於都虞之職也

【遼史百官志】南面朝官殿中司殿中聖宗開泰元年見殿中高可恆殿中丞尙舍局見遼朝雜禮奉御尙乘局奉御尙輦局奉御尙食局奉御尙衣局奉御○宣徽院太宗會同元年置宣徽使知宣徽院事馬得臣統和初知宣徽院事宣徽副使同知宣徽使事同知宣徽院事○內省內省使聖宗太平九年初見內省使內省副使內藏庫內藏庫提點道宗清寧元年見內藏庫提點耶律烏爾古蒙古語。孳生也。原作耶律烏骨。今改正。○諸監職名總目某太監某少監某監丞某監主簿○太府監○少府監○將作監

謹案以上皆南面官也史言宣徽等官雖分北南其所治皆北面之事蓋指其供奉宮廷者而言也南面朝官大率承倣唐制而強半缺略元人修史時已不能盡得其詳僅於史文之散見者推

而得之。今撫取其近於內務府者錄之。以著一代設官之略焉。

金

【金史百官志】工部屬官修內司

大定七年設

使從五品。副使從六品。掌宮中營造事。兵匠一千六十五人。兵夫二千。仍命少

府監長官提控

直長二員。正八品。部役官四員。正八品。掌監督工役。受給官二員。正八品。掌支納諸物。祇應

司提點從五品。令從六品。丞從七品。掌給宮中諸色工作。直長正八品。收支庫都監同監。泰和元年置

謹案。修內祇應二司。如今之營造司及造辦處。列代皆屬少府。而金獨隸于工部。以其爲供給宮

中工作。故別著于此。

【金史百官志】殿前都點檢司。宮籍監提點正五品。監從五品。副監從六品。丞從七品。掌內外監戶

及地土錢帛小大差發。直長二員。正八品。掌同丞。近侍局提點正五品。泰和八年。創設。使從五品。副

使從六品。掌侍從承敕令轉進奏帖。直長正八品。

大定十八年。增二員。奉御十六人。舊名入寢殿小底。奉職三十人。舊名不入寢殿小底。又名外帳小底。皆大

定十二年

更。鷹坊提點正五品。使從五品。副使從六品。掌調養鷹鵠海東青之類。直長正八品。不限員數

從九品。不限員數實考

謹案。金制殿前都點檢司。蓋兼古殿中監之職。與宋代殿前司專掌宿衛武職者不同。故宮籍提點。近侍提點。如今內管領之職。而鷹坊提點。則今養鷹狗處之職。其所屬侍衛指揮等官。已別見

領侍衛篇。茲不具錄。

【金史百官志】宣徽院。左宣徽使正三品。右宣徽使正三品。同知宣徽院事正四品。同簽宣徽院事正五品。宣徽判官從六品。掌朝會燕享。凡殿庭禮儀及監知御膳。所隸營手傘子二百三十人。控鶴二百人。尙衣局提點

正五品。使從五品。副使從六品。掌御用衣服冠帶等事。都監正九品。舊設後直長正八品。同監正九

品。尙食局。元光二年。參用近侍奉御奉職。都監三員。正九品。不限資考。生料庫都監。同監各一員。掌給受生料物色。收

支庫都監。同監各一員。掌給受金銀裹諸色器皿。以外路差除人內選充。尙藥局提點正五品。使從五品。由職官內選除。

副使從六品。掌進湯藥茶果。直長正八品。都監正九品。果子局都監。同監各一員。掌給受進御果子

本局本把御藥院提點從五品。直長正八品。掌進御湯藥。明昌五年。設。以親信內侍人充。都監正九品。不限員。泰和令四員。同

監從九品。不常除。泰和令無。內藏庫。大定二年。分爲四庫。使從五品。副使從六品。掌內府珍寶財物。率隨庫都監等。供

奉其事。直長一員。承安三年增。頭面庫都監正九品。同監從九品。本把十人。大定二年。出身依不入寢殿小底例。段正庫都監

正九品。同監從九品。本把十人。金銀庫都監正九品。本把八人。雜物庫都監正九品。同監從九品。本把八人。每

庫知書二人。宮闈局。舊名宮門司。大定二年。改爲局。舊設令。丞。改爲使。副。提點正五品。使從五品。副使六品。掌宮中閣門之禁。率

隨位都監。同監及內直各給其事。直長正八品。內直一百七十人。後作百七十九人。

【王圻續文獻通考】金內侍職見于衛尉司內。內侍局中常侍見于宣徽使內。其事多分領于宣徽

使而內侍省不設。

謹案金內侍諸職多領于宣徽使而內侍省不設深得成周奄人領於冢宰漢代宦官屬於少府之遺意今考宣徽使尙衣尙食等局卽殿中監之六尙也御藥內藏庫金銀庫卽內侍省之御藥房內庫使也是宣徽一院合二省而兼理之與今日內務府之職掌最爲脗合。

【續文獻通考】金太府監官屬典給署屬焉典給署本鈎盾署古屬司農寺金初曰鈎盾使明昌三年改掌宮中所用薪炭冰燭

【金史百官志】少府監尙方織染文思裁造文繡等署隸焉泰和四年選能幹官兼儀鸞局近上官監正四品少監從五

品丞二員從六品大定十一年省復置掌邦國百工營造之事尙方署令從六品丞從七品掌金銀器

物亭帳車輿牀榻簾席鞍轡傘扇及裝釘之事大定二十年令不專除人令人兼直長正八品圖書署明昌七年入祇應司令從

六品丞從七品掌圖書縷金匹直長正八品明昌三年罷裁造署令從六品丞從七品掌造龍鳳車具亭

帳鋪陳諸物宮中隨位牀榻屏風簾額條結等及陵廟諸物并省臺部內所用物泰和令有繪畫之事直長從

八品明昌三年省裁造匠六人針工婦人三十七人文繡署令從六品丞從七品掌繡造御用并妃嬪等服飾及燭籠照道

花卉貞祐二年止設官一員直長正八品繡工一人都繡頭一人副繡頭一人女四百九十人內上等七十人次等凡四各二十六人文思署明昌七年省入祇應司令

從六品丞從七品掌造內外局分印合傘浮圖金銀等尙輦儀鸞局車具亭帳之物并三國生日等

禮物造織染文繡兩署金線直長正八品明昌三年省去

元

【元史百官志】宣徽院秩正三品。掌供玉食。凡稻粱牲牢酒醴蔬果庶品之物。燕享宗戚賓客之事。及諸王宿衛齊哩克。

蒙古語。兵也。原作怯憐。今改正。

口糧食。

蒙古萬戶千戶合納差發。係官抽分牧養孳畜。歲支

芻草粟菽。羊馬價直。收受闌遺等事。與尙食。尙藥。尙醢。三局皆隸焉。所轄內外司屬用人。則自爲選。大都尙飲局。秩從六品。掌醢造上用細酒。大都尙醢局。秩從六品。掌醢造。諸王百官酒醴。大都醢源倉。秩從六品。掌受香莎蘇門等酒材糯米鄉貢麴藥。以供上醢。及歲賜諸王百官者。尙珍署秩從五品。掌收濟寧等處田土子粒。以供酒材。安豐懷遠等處稻田提領所。秩從九品。掌稻田布種。歲收子粒。轉輸醴源倉。諸物庫秩從七品。掌出納闌遺。監秩正四品。掌不闌奚人口頭正諸物。尙食局秩從五品。掌供御膳及出納油麴酥蜜諸物。大都生料庫。秩從五品。大都上都柴炭局各一。尙收所秩從五品。沙糖局秩從五品。掌沙糖蜂蜜煎造。及方貢果木。豐儲倉秩從九品。大使一員。掌出納車駕行幸支持膳羞。

謹案。元宣徽院兼統光祿寺諸職。與列代異。而醴源倉之供上醢。尙食局之供御膳。則仍爲古殿中監之職。其柴炭沙糖諸局。亦與都虞司茶膳房諸職相近。故並錄之。又元太醫院屬官。有御藥局使副。亦卽今內藥房之職。併識于此。